

Vun driweriwer

erscheint auf www.lenauheim.de

monatliche
Erscheinung

Juli 2014

von *Helen Alba*

Rosmareiner geije un tanze in Wertshausszene

De Schriftsteller Ioan T. Morar hat e Buch gschrieb „Lindenfeld“ un sich im Banater Berglanddorf mitm gleiche Name, in dem wu johrelang nor noch eene Deitscher gelebt hat, dokumentiert. Aus dem Roman hat de Regisseur Radu Gabrea sich inschpiert un so is de Film „Lindenfeld, e Liebesmärchen“ entstann, der im Juni 2014 im Temeschwarer Moll-Kino in Premiere gewies gin is. Vum Hemweh geploot

In Frankfurt hat de Ulli Winkler, e älterer Herr, Präsident vun eem große Unternehme, in seiner Wohnung ghuckt un mit starrem Blick uf de Fernseher gschaut. Geloff is e Dokumentarfilm iwer des Banater Berglanddorf Lindenfeld. Dorte is Ulli uf die Welt kumm un hat bis 1945 gelebt. Un im Nu schlaan dem Mann sei Gedanke Porzibaam. Er gsieht in Gedanke versunk Frucht- un Sunneblumefelder. Es war im Schnitt, wie sei Landsleit die Frucht mit der Sichel abgemacht han. Er als junger Bu un sei Mädli Helga han in der Mittachszeit Wasser for die Schnitter ghol un sich derbei wiederholt ihre jungi Lieb erklärt. Ufmol de Schrei vun eem ausser Ochtum anlaafende Weib: „Die Russe kumme!“ Un ufmol han em Ulli sei Eltre, villi anri (uner dene ach es Helga) im iwerdeckte Auto ghuckt un sin abgfiehrd gin. Em Ulli is es gelung zu entwische, weil er sich zwischer de Sunneblume verstopfelt hat. (Ich meeht derezu saan, dass der Regisseur sich die Schnittzeit for die Szene gewählt hat, obzwar die Russlandverschleppung jo im eikalte Winter, im Jänner 1945 war.)

Es Schicksal hat de junge Ulli uf Deutschland verschlaa, wu er zu großem Vermeje kumm is. Doch sei Banat un es Helga hat er nie vergesse kenne. Während een Bsuch beim Dokter, der ihm erklärt hat, dass er an Alzheimer im Anfangsstadium erkrankt is, hat ne e ehemolichi Landsmännin erkannt um em gsaat, dass es Helga in Lindenfeld lebt. Des war de Ausleeser, dass de Ulli sich stipperlich mit seim Schoffeer un langjährige Diener Boris uf de Wech ins Banat gemacht hat. Un was hat er dorte angetroff: leeri un zammgefalleni Häiser, e Kerch, die mehr eener Ruine geglich hat. E enziches Haus, vun wu mer e Stimm gheert hat, es war em Helga seini. So han die zwaa sich noh 60 Jahr wieder getroff un es Verzähle mitnaner hat beidi ufgewuhlt.

Lindenfeld-Stiftung geplant

Ulli fahrt schnurstracks zuruck uf Frankfurt un plant ufm Wech, die Lindenfeld-Stiftung ins Lewe zu rufe un sei Heimatdorf wieder ufzubaue. Do dervun is sei Sohn Dieter iwerhaupt nit begeischert, er gsieht sei Erbe zum Finschter naus fliehe un berot sich mit seim Rechtsanwalt. Weil alli zwaa nit vill wert sin, finne se so e Art Diletant in Rumänien, der sich bereit erklärt (for villes Geld natierlich), de Ulli hinners Licht zu fiehre. Weil jo niemand gewisst hat, dass Ulli bereits in Lindenfeld war, werd der sogenenti „Schauspiller“ als Richter vun Lindenfeld em Ulli präsentiert. Er lad ne dorthin in un verspricht ihm die Ehrenbürgerwürde seiner Geburtsortschaft. Derbei verhaschpelt er sich dermassen in Lügenmärchen, dass Ulli sofort weess, wievill die Uhr gschlaa hat, losst sich jedoch nix anmerke, dass er dem Schlaumeier nit glaabt. Er spillt mit.

Empfang mit Blechmusik un Trachtephaare

Ulli hat sich teerisch gstellt un is wieder uf Lindenfeld gfahr, wu er bei Helga gewohnt hat. In eem improvisierte Wertshaus ware die Vorbereitunge in vollem Gang. Die „Banater Rosmareiner“ (Tänzer un Orchester) ware aus Temeschwar angereist un han fescht geprobt. Wie Helga un Ulli ins Wertshaus intrete, were se mit eem Marsch empfang un vum „Richter“ uf ihre Ehrenplatz geleit, es is gess un getrunk gin. Dereweil han die Rosmareiner e Polka getanzt un wie die Musikante e Walzer anschlaa han, han ach Ulli un Helga getanzt. Ulli is es schlecht gin, er is zammgebroch un die zwaa sin hemgang. Noh eener Nacht, die se mitnaner verbrung han, war em Ulli bewusst, dass ne sei Gedächtnis meh un meh verlosst. Beim Abschied vun Helga hat er ihr e Briefumschlach mit eener Vollmacht iwerreicht un Helga hat freiji Hand kriet, was die Lindenfeld-Stiftung anbelangt. Schweren Herzens un mit träneverschlaierem Blick is Ulli for immer abgereist.